



REPUBLIKA E KOSOVËS - REPUBLIKA KOSOVA - REPUBLIC OF KOSOVO
KËSHILLI GJYQËSOR I KOSOVËS - SUDSKI SAVET KOSOVA - KOSOVO JUDICIAL COUNCIL
PANELI ZGJEDHOR PËR ANKESA DHE PARASHTRESA
IZBORNI PANEL ZA ŽALBE I PREDSTAVKE - ELECTION COMPLAINTS AND APPEALS PANEL

Anr.272/2025

PANELI ZGJEDHOR PËR ANKESA DHE PARASHTRESA (PZAP), në panelin e përbërë nga gjyqtarët: Bujar Muzaqi kryesues, Violeta Husaj Rugova, dhe Hajriz Hoti anëtarë, duke vendosur përkitazi me ankesën e subjektit politik Partia Demokratike e Kosovës (PDK) me seli në Prishtinë, paraqitur kundër subjektit politik Lëvizja Vetëvendosje (LVV), me seli në Prishtinë, për shkak të shkeljes së Kodit të Mirësjelljes për Subjektet Politike, Mbështetësit e tyre dhe Kandidatët, gjatë fushatës zgjedhore, për Zgjedhjet e Përgjithshme për Kuvendin e Republikës së Kosovës që do të mbahen më datë 09.02.2025, në seancën e panelit të mbajtur më datë 03.02.2025, merr këtë:

VE N D I M

- I. PRANOHET e bazuar ankesa e subjektit politik Partia Demokratike e Kosovës (PDK), me seli në Prishtinë, Anr.272/2025 të datës 31.01.2025.
- II. Subjektit Politik Lëvizja Vetëvendosje (LVV), me seli në Komuna Prishtinë, për shkak të shkeljes së Kodit të Mirësjelljes për Subjektet Politike, Mbështetësit e tyre dhe Kandidatët, i shqiptohet dënimi më gjobë në lartësi prej 3,000.00, Euro (tremijë) Euro.
- III. Detyrohet Subjektit Lëvizja Vetëvendosje (LVV), që gjobën e shqiptuar si në pikën -II-, të dispozitivit të këtij vendimi, ta paguaj në afat prej 15 ditëve, nga dita e plotfuqishmërisë së këtij vendimi.

A r s y e t i m

Me datën 31.01.2025 PZAP-i, ka pranuar ankesën e identifikuar me numër Anr.272/2025, nga subjekti politik Partia Demokratike e Kosovës (PDK), me seli në Prishtinë, kundër subjektit politik Lëvizja Vetëvendosje (LVV), në të cilën pretendohet se më datë 29 janar 2025, kandidati për deputet nga radhët e subjektit politik Lëvizja Vetëvendosje, aktualisht ministër i Ministrisë së Bujqësisë, z. Faton Peci, në tubimin e mbajtur në Komunën e Vushtrrisë, në fjalimin e mbajtur në këtë tubim, ndër të tjerash deklaroi: *"Vushtrria e zemërgjerësisë nuk i lenë pa diçka edhe këta të pabesisë. Opozitës së kotësisë jam i bindur që Vushtrria i'a ka nda hamamin e Vushtrrisë. E hamami nuk është keq, aty e kanë mundësinë me u flladit, me reflektu edhe njëherë në opozitë, e nga mëkatet me u pastru, e pas pastrimit edhe me u pendu, e gradualisht me fillu një proces të njëmend të reformimit të tyre."*, gjuhë e cila përmban nxitje, urrejtje, ofendim, denigrim dhe njëherit shprehë ngjyime përçmuese ose nënvlerësuese për partitë kundërshtare të Lëvizjes Vetëvendosje. Për qëllime të argumentimit

të afatshmërisë së ankesës, PDK, njofton PZAP, se tubimi në të cilën z. Faton Peci, ka mbajtur fjalimin i cili është objekt i kësaj ankesë, është mbajtur më datë 29 janar 2025, në ora 19:00/h, në Sheshin e Komunës së Vushtrrisë. PDK vlerëson se në veprimet e z. Faton Peci janë konsumuar të gjitha elementet e veprimit të ndaluar, të përcaktuar në nenin 34, paragrafi 1 nën paragrafi. 1.11 të Ligjit për Zgjedhjet e Përgjithshme në Republikën e Kosovës. Parashtruesi i ankesës si provë ka bashkangjitur CD, me përmbajtje të videoincizimit të fjalimit, si dhe ftesë publike të publikuar nga Lëvizja Vetëvendosje.

Në përgjigjen për ankesën Anr.272/2025 të subjektit politik Lëvizja Vetëvendosje LVV, të njëjtën e ka vlerësuar si të pabazuar me pretendimin se njëjta nuk është e drejtuar ndaj ndonjë subjekti konkret, në këtë rast, as ndaj pretenduesit e parashtruesit PDK. Andaj PDK vet aludon në vetveten kur përmendet korrupsioni, pra, z. Peci në deklaratën e tij në asnjë rast nuk thekson subjektin e pretenduesit, në këtë rast PDK-në dhe në asnjë rast nuk e ndërlidhe atë me shprehjet që bien ndesh me rregullat zgjedhore. Brenda rregullave zgjedhore dhe frymës së fushatës elektorale, kandidati Peci vë theks në nevojën e vazhdimësisë se kësaj qeverisje, marrë parasysh keq-qeverisjet e kaluara.

PZAP-i, pasi që shqyrtoj dhe vlerësoi ankesën gjeti se:

-Ankesa është e bazuar.

Paneli, pas shikimit të shkresave të lëndës të ofruara si provë materiale, ka gjetur se kandidati i subjektit politik LVV, dhe atë: **z.Faton Peci**, kandidat për deputet nga radhët e subjektit politik Lëvizja Vetëvendosje, aktualisht ministër i Ministrisë së Bujqësisë, në tubimin e mbajtur në Komunën e Vushtrrisë, ka deklaruar: *"Vushtrria e zemërgjerësisë nuk i lenë pa diçka edhe këta të pabesisë. Opozitës së kotësisë jam i bindur që Vushtrria i'a ka nda hamamin e Vushtrrisë. E hamami nuk është keq, aty e kanë mundësinë me u flladit, me reflektu edhe njëherë në opozitë, e nga mëkatet me u pastru, e pas pastrimit edhe me u pendu, e gradualisht me fillu një proces të njëmend të reformimit të tyre."*

Paneli vlerëson se gjuha e përdorur si më lartë nga kandidati për deputet, i subjektit politik LVV, është gjuhë denigruese dhe urrejtëse në raport me subjektin politik PDK dhe se përdorimi i një gjuhe të tillë është në kundërshtim me nenin 34 pika 1.11), e LZP-së, me të cilën përcaktohet: *"Gjatë periudhës së fushatës, subjekti politik, mbështetësit ose kandidatët e tij, ndalohen nga bërja e ndonjëres si në vijim: ... 1.11) përdorimi i gjuhës, në formën e shkruar ose gojore, që nxit ose provokon, ose që mund të nxisë ose provokojë, një person tjetër për të kryer një akt të dhunës kundër personave tjerë ose pasurisë, ose e cila nxit apo mund të nxisë urrejtje kundrejt të tjerëve ose duke publikuar ose përdorur fotografi, simbole ose çfarëdo materiali tjetër që ka ose mund të ketë ndikim të tillë"*.

Sipas Panelit përmbajtja e deklarimeve të tilla të konsiderohen gjuhë nxitëse dhe urrejtëse kundrejt subjektit politik PDK, dhe se kjo konsiderohet shkelje e rregullave zgjedhore në Kosovë, nga se deklaratimet e tilla në kohë të fushatës zgjedhore, kane për qëllim të krijojnë polarizim të elektoratit, të krijojnë atmosferë tensioni ose të nxisë ndjenja të urrejtjes dhe të përçarjes, të acaroj rivalitetin politik. Paneli vlerëson se partitë dhe kandidatët janë të detyruar të respektojnë etikën zgjedhore dhe të shmangin veprime apo deklaratime që mund të sjellin pasiguri, destabilitet apo të përkeqësojnë atmosferën politike në përgjithësi, njëkohësisht janë

te obliguar të respektojnë dinjitetin dhe integritetin e të tjerëve. Përdorimi i gjuhës së tillë mund të dëmtojë procesin demokratik dhe të rrisë tensionet në vend. Kjo është një shkelje e rregullave që kërkojnë një fushatë paqësore, të ndershme dhe të drejtpërdrejtë.

Andaj Paneli gjeti se gjuha e përdorur është në kundërshtim me Kodin e Mirësjelljes për Subjektet Politike, Mbështetësit e tyre dhe Kandidatët gjegjësisht me dispozitat e nenit 34 LZP-së, ku janë të përcaktuara veprimet e ndaluara të subjekteve politike dhe me këto veprime janë shkelur dispozitat e nenit 34 paragrafi 1 nën paragrafi 1.11 të LZP-së.

Paneli, me rastin e vendosjes se gjobës si në dispozitiv të këtij vendimi, ka marrë parasysh të gjitha rrethanat si në vijim: natyrën e shkeljes dhe ndikimit të mundshëm të saj në procesin zgjedhor në fjalë, shkallën dhe peshën e shkeljes, se veprimet e tilla përbëjnë përsëritje të shkeljeve për nga natyra, pjesëmarrjen e subjektit në fjalë në zgjedhjet e mëparshme që konsiston në faktin se subjekti politik LVV, ka qenë i njoftuar me obligimet dhe përgjegjësit gjatë procesit të fushatës, shkeljet e Ligjeve zgjedhore në fuqi që ka bërë subjekti në fjalë në këto zgjedhje dhe në zgjedhjet e mëparshme në Kosovë që do të thotë se i njëjti është i njoftuar me rregullat zgjedhore.

Duke pas parasysh se Rregullorja 01/2024. dhe dispozitat e LZP, neni 120 paragrafi 1 nën paragraf 1.3 për shkelje të tilla parashohin dënimin me gjobe deri në 50.000 euro, Paneli me rastin e shqiptimit të gjobës ka pasur parasysh edhe praktikën e mëhershme për rastet të ngjashme si dhe faktin që subjekti politikë në fjalë ka bërë shkelje të natyrës së njëjtë në mënyrë të përsëritur.

Nga arsyet e theksuara me lart, e në kuptim të nenit 34 paragrafi 1 nën paragrafi 1.11), neni 118 paragraf 1 dhe neni 120 paragrafi 1 nën paragrafi 1.3 të LZP-së, vendosi si në dispozitiv të këtij vendimi.

Paneli Zgjedhor për Ankesa dhe Parashtresa
Anr.272/2025 më datën 03.02.2025

Kryesues i Panelit
Bujar Muzaqi



Këshilla Juridike: Kundër këtij vendimi nuk lejohet ankesa konform nenit 118 paragrafi. 4 të LZP-së.